

§. 33. Vbi duplex notandum venit consolationis momentum, tum quod DEVS spes est inopis, tum quod est in generatione iusta, & non est in ea otiosus, sed cum benedictione, Ps. III. v. 2. Autor operis imperfecti, homil. 45. in Matth. statuit de bonis parentibus nasci bonos filios; quod si non intelligat Ἐνδεχομένῳ & plerunque siue nonnunquam fieri, concedi non potest. Nam parentes liberos generant non secundum gratiam, sed naturam ut rectè contra Pelagium disputat Augustinus, & natura sine gratia sordet, ait Prosper Aquitanicus Epist. ad Ruffin. & carnali natiuitate omnes filii sumus iniustorum, cum vero per Christum renascimur, reddimur generatio iustorum, Dominumque quærentium Psalm. 25. v. 6. de iustis & legitimis nuptiis filiorum DEI, non filii DEI, sed filii seculi generantur, inquit Augustinus lib. 1. de nupt. cap. 17. Sic ab Adamo erat Cain, à Noha Cham, ab Isaaco Esau, quem tamen saluum esse probabiliter putat Lutherus à Davide Absolon, à Ieroboamo Abia super quem inventus est sermo bonus à Domino I. Reg. 14. v. 13 & notum est proverbium: Heroum filii noxa & illud Homericum:

Παῦροι γάρ τινι παῖδες ὁμοῖοι πατρὶ πέλονται  
Οἱ πλεονες κακίης, παῦροι δὲ τε πατρὸς ἀρείου.

Vide Erasmus in Chiliad. 1. Cent. 6. Euripid. in Helen. & Heraclid. & Tyraquell. de Nobil. cap. 22. num. 23. & seq. & in lib. 7. connubial. à num. 1. & deinceps & maxime in 9.

Quid? Si vel naturaliter generant parentes, non semper liberos edunt sibi similes: Exempla narrant Quintilianus, in declamat. pro fœmin. Hieron. in quæstion. Hebr. in Genes. Augustin. lib. 2. tractat. cap. 62. Thomas Morus in elegante carmine ad Sabinum. Sed urget autor, verba Christi, Matth. 23. vers. 31. Itaque testimonio estis vobismet ipsis, quia filii estis eorum qui Prophetas occiderunt: R. Concedamus sanè hoc: concedamus Horatio od. 4. lib. 4. fortes creari fortibus & bonis: vera scripserit Seneca: redit ad autores genus, stirpemque pravam degener Sanguis refert: aliud

est